

Déi Aarbechte lafen, wéi gesot. Parallel lafen och d'Aarbechten un der Reform, also um Fong vum Tutellesregimm. Déi Aarbechte gi weider. Do war effektiv och schonn en Text mat ausgeschafft ginn. Mir sinn awer elo amgaangen, dee wierklech Artikel fir Artikel och ze kucken, notamment och mat den Autorité-judiciairen, well mer et wichteg fannen, datt mer hire Feedback hei hunn.

Dir hutt richtig gesot, datt mer eng Reform brauchen. Et ass effektiv esou, datt mer net méi en ligne si mat internationale Konventionen, well am Moment effektiv d'Tendenz ass, an eng aner Richtung ze goen an deene Persounen, déi, wéi gesot, ënner enger Tutelle sinn oder an enger Sauvegarde oder an enger Curatelle, och méi Autonomie ze ginn.

Mir schaffen och weider um Plan d'action. Do ware 16 Aktiounen virgesinn am leschten, wouvun der eng Rei erfëllt goufen, notamment och déi, fir d'Unzuel vun de Richterinnen an d'Luucht ze setzen, e Contrôleur anzeféieren an, wéi gesot, de Mandat de protection judiciaire. Deen ass an der Prozedur. Do waarde mer op den Avis vum Staatsrot a mer hoffen, datt mer e geschwë kréien.

Elo nach kuerz zur Reform, un där mer schaffen. Bon, mir hunn als Basis natierlech déi franséisch Reform geholl mat e puer Elementer aus dem belsche Recht, a mir integréieren och eng ganz Rei Elementer aus dem leschte PAN, wou och un engem neie geschafft gëtt. Mee alles dat leeft an do hoffen ech dann, datt mer och geschwënn eng Kéier eppes kënnen presentéieren.

M. Claude Wiseler, Président | Merci, Madamm Minister. Här Biancalana, hutt Dir nach eng ganz kuerz Zousazfro?

M. Dan Biancalana (LSAP) | Villmools merci. Merci och fir d'Äntwerten, déi een hei konnt kréien. Dir sot par rapport zu der éischter Fro ronderëm d'Tarif, dass effektiv do en Alignement besteet, dass do Bestriewunge sinn, och, mengen ech, eng eenheetlech Approche ze hunn. Wéi Der virdru gesot hutt, gegebenfalls misst een do mam Ministère de la Famille kucken a punkto Konventionnement. D'Fro ass einfach: Gëtt et eng Volonté politique vun der Regierung, fir an déi dote Richtung ze goen, fir deen doten Dossier an déi dote Richtung weiderzedreien? Well ech mengen, datt dat och eng gewësse Sécurité gëtt finanzieller Natur, awer och par rapport zum Optrag, deen effektiv déi professionell ASBL kréien am Kader vun de Missiounen, déi se fir d'Justiz och deementspreechend ëmsetzen.

Merci.

Mme Elisabeth Margue, Ministère de la Justice | Also mir siche ganz kloer de Kontakt op deem dote Punkt. Mee dat ass eng Decisioun, déi mer herno wäerte gemeinsam treffen.

M. Claude Wiseler, Président | Merci, Madamm Minister. Domat wier dës Punkt dann och ofgeschloss.

13. 8433A – Projet de loi portant modification de la loi modifiée du 7 juin 2012 sur les attachés de justice en vue de déterminer les conditions de diplôme et d'expérience professionnelle dans le domaine du droit

An da fuere mer weider mam Projet de loi 8433A iwwer d'Rekrutierung an d'Berufsausbildung vun den Attachés de justice. D'Riedezäit ass hei nom Basismodell festgeluecht an deemno follgendermoossen opgedeelt: De Rapporteur huet 10 Minutten, all

Fraktioun a Sensibilitéit huet 5 Minutten, d'Regierung huet 10 Minutten. Et hu sech schonn ageschriwwen: den Här Donnersbach, d'Madamm Beissel, den Här Biancalana, den Här Hardy, d'Madamm Tanson an den Här Clement. An d'Wuert huet elo de Rapporteur vum Projet de loi, den honorabelen Här Alex Donnersbach. Här Donnersbach, Dir hutt d'Wuert.

Rapport de la Commission de la Justice

M. Alex Donnersbach (CSV), rapporteur | Merci, Här President. Léif Kolleegen, d'Justiz ass e wichteg Fundament an eisem Rechtsstaat. Si muss fair a si muss effizient sinn. Eng gutt funktionéierend Justiz muss dowéinst och zougänglech si fir allméiglech Talenter.

An de leschte Joren hu mer gesinn, datt de Rekrutement vun den neie Magistraten eng Erausforderung war. Ze vill Poste bleiwen onbesat an d'Konditione fir den Zougang zur Magistratur erlaben et ville gudde Juristen net, an d'Magistratur ze kommen. Dofir soll dës Projet de loi, deen eis hei zur Ofstëmmung virläit, d'Konditione fir den Zougang zu der Magistratur moderniséieren an et enger méi grousser Zuel vu qualifizéierten Kandidaten erméiglechen, an d'Magistratur ze kommen.

Dës Projet ass net just eng technesch Upassung, et ass och eng substanzuell Ännerung, déi garantéiert, datt eis Justiz och an Zukunft nach kompetent Magistrate fënnt, fir déi vill nei Posten ze besetzen, déi mir notamment am leschte Joer kreéiert hunn.

D'Justizministesch huet dës Projet de loi den 2. August 2024 deposéiert. No der Weiderleedung un d'Justizkommission den 12. September 2024 koumen eng ganz Rei Avisen.

(M. Fernand Etgen prend la présidence.)

Grundsätzlech hunn déi verschidde Gremie vum Conseil national de justice iiwert de Regroupement des magistrats luxembourgeois an der Commission de recrutement et de formation des attachés de justice, awer och de Barreau, den neie Gesetzestext begréisst.

D'Kommission huet am Januar eng Rei Amendementen ugeholl an dës Projet de loi op Proposition vum der Magistratur, also vum Conseil national de justice a vun der Commission de recrutement et de la formation des attachés de justice, an zwee Deeler opgespléckt. Dës Projet, deen eis haut virläit, deen haut zur Ofstëmmung kënn, fokusséiert sech op déi Rekrutementskonditione, während den zweeten Deel sech méi spéit mat der Formation vun den Attachés de justice beschäftegt.

Vu datt de Rekrutementsprozess elo am Abrëll ufänkt, war et wichteg, dësen Text elo nach am Mäerz ze stëmmen an der Magistratur schonn dës Joer d'Méiglechkeet ze ginn, méi breet ze rekrutéieren.

De Staatsrot huet de Projet de loi a sengem Avis am groussen Ganze begréisst, mee e puer technesch Upassung recommandéiert. Fir d'Detailer vun de verschiddenen Avisa verweisen ech op mäi schrëftleche Rapport.

Am Detail bréngt de Projet de loi eng Rei vun Ännerungen, déi essenziell sinn, fir dem Defizit un neie Magistraten an der Lëtzebuerger Justiz entgéintzewirken. Fir d'éischt ännert dës Gesetz d'Rekrutementskrittären, andeem se sech méi flexibel mécht a sech fir Kandidaten mat enger relevanter Erfahrung am Droit aus verschiddene Berufsgruppen opmécht. Bis elo konnten am Fong nëmmen Affekote mat fënnf Joer Erfahrung op Dossier rekrutéiert ginn. An Zukunft kënnen Juristen aus der Privatwirtschaft, beim Staat, op der Universitéit oder aus soss relevante juristesche

Gebitter hir Kandidatur op Dossier bei der Magistratur stellen.

Da ginn d'Konditione par rapport zu der relevanter Erfahrung am juristesche Beräich och ugepasst: Kandidaten, déi op Basis vun engem Concours rekrutéiert ginn, müssen an Zukunft eng Minimumerfahrung vun zwee Joer amplaz vun engem Joer hunn, an de Rekrutement op Dossier bleift bei fënnf Joer, mee eeben an engem méi groussen Beräich. Et gesäit een och fir d'Joren 2025 an 2026 eng Transitionsregelung vir, déi et deene Kandidaten erlaabt, déi op Basis vum Concours rekrutéiert gi sinn, nach mat engem Joer Erfahrung acceptéiert ze ginn.

Ofschléissend ass et wichteg ze betounen, datt selbstverständlech d'Konditioun vun der Lëtzebuerger Nationalitéit bestoe bleift, well d'Magistraten eng direkt Roll an der Ausübung vun eiser Staatsgewalt hunn. D'Fro vun de Sproochenexigenze gëtt an deem aneren Text, deen elo nach net duerch ass, präziséiert.

Domat schléissen ech mäin Exposé als Rapporteur.

Discussion générale

Erlaabt mer, nach e puer Wieder als Spriecher vu menger Fraktioun ze soen. Dës Projet ass eng wichteg an noutwendeg Upassung vun de Rekrutementskrittären an der Magistratur. Et ass eng positiv Weiterentwicklung vun eiser Justiz an et ass och déi logesch Suite vun deem Gesetz, dat mir d'leschte Joer gestëmmt hunn, wou mer eng Panoplie vun neie Posten an der Justiz geschafen hunn, déi och wichteg sinn, fir datt mer nokomme mat all de Fäll, déi am Moment do sinn.

Eng Justiz, déi sech moderniséiert, muss sech och un d'Realitéit vum Aarbechtsmarché upassen. Et ass evident, datt mir net méi mat deem ale Rekrutierungsmodell vun deene leschte Joerzénge konnte weiterfuere, fir d'Besoinen vun haut ze decken. Gläichzäitig erlaabt dës Neierung och der Justiz, interessant nei Profiller, nei Juristen ze rekrutéieren, déi bis elo duerch déi Rekrutierungskrittären praktesch ausgeschloss waren. Et ass e kloer Win-win fir jiddwereen.

D'Fro, déi nach am Kader vun der Ouverture opgeworf gi war, ass, ob dës Reform zu engem Qualitätsverlust kéint féieren. Hei ass d'Äntwert kloer Nee: D'Selektioun bleift streng, d'Exigence vun der Erfahrung bleift erhalen, gëtt souguer gestärkt fir d'Admissioun zum Examen-Concours. Eis zukünfteg Magistrate wäerte weiderhin eng héich Kompetenz un d'Dageslicht bréngen. An anere Wieder: Mir maachen d'Magistratur net méi einfach, mir maache se méi einfach zougänglech oder iwwerhaupt mol zougänglech fir verschidde gutt Profiller, déi mer an Zukunft brauchen.

Här President, léif Kolleegen, wéi Der gesitt ass dës Projet e wichtige Baustee fir d'Moderniséierung vun eiser Justiz. An deem Sënn ginn ech heimat den Accord vun der CSV-Fraktioun a bieden Iech ëm Är Ënnerstützung. Merci.

M. Fernand Etgen, Président de séance | Merci villmools, Här Donnersbach. An den nächsten ageschriwwene Riedner ass déi honorabel Madamm Simone Beissel. Madamm Beissel, Dir hutt d'Wuert.

Mme Simone Beissel (DP) | Merci, Här President. Léif Kolleginnen a Kolleegen, virop dem Alex Donnersbach e Merci fir säi kloer schrëftlechen a mündleche Rapport. Ech wäert e puer Saachen erëm eng Kéier ënnersträichen, well et ass einfach ze wichteg, eebe well d'Justiz ee vun de Grundpilleren ass vun eisem demokratesche Rechtsstaat. A fir dass dat funktionéiert an d'Grundrechte vun eise Bierger geschützt sinn, brauche mer eng Justiz, déi an all hire

Secteurs an an all hiren Institutionen uerdentlech funktioniert. Ass dat net de Fall, well eebe Riichter feelen, da können d'Grondrechter vun eise Bierger, notamment fir hir Dossieren a rasonablen Delaien traitiert ze gesinn ..., dann sinn déi a Gefor.

Mir wëssen, dass Lëtzebuerg extrem schnell gewuess ass. D'Awunnerzuel ass an de leschte Joerzénge wirklech exponentiell an d'Luucht gaang. Dat ass zwar gutt fir eist Land, mee dat bréngt awer e ganze Koup Erausforderunge fir all eis Institutionen, virun allem an der Justiz, well déi war nach fir eng Zuel vun Awunner opgestallt, déi manner grouss war, an dofir ass an de leschte Jore wirklech eng akut Iwwerlaaschtung. Awer mir brauchen e Justizapparat mat genuch Leit, well d'technesch Dossieren – an iwwerhaupt d'Dossieren – ginn ëmmer méi komplizéiert, an dofir mussen gutt an ausgebildete Leit do sinn.

Här President, mir hunn oft um Terrain mat de Leit geschwat, fir eebe kënne performant Léisungen à long terme ze fannen. Mir wëssen, dass säit Joren – an et gëtt ëmmer méi akut – wirklech e Manktum ass u Lëtzeburger, déi d'Konditiounen erfëllen, fir an d'Magistratur kënne erazekommen.

Wat bréngt dann elo den neie Projet haaptsächlech? Den Alex Donnersbach huet et scho widderholt: Et ass wirklech eng grouss Ouverture. D'Ouverture ass eebe just, dass et elo opgrond vun den Dossieren breet gefächert gëtt, dass Juristen, déi fënnf Joer laang geschafft hunn, déi d'Lëtzeburger Nationalitéit hunn, elo eeben eng Kandidatur kënne stellen, fir an d'Magistratur erazekommen. A mat deem System vun där Ouverture – an dat geet et jo niewent der Eligibilitéit fir den Examen-Concours, an do ass et lo vun engem op zwee Joer eropgesat ginn, fir eebe just d'Performance ze garantéieren – gi mer dervun aus, dass mer d'Zuel vun de Lëtzeburger, déi sech do mellen, wirklech an d'Luucht setzen. An dat begreist d'DP natierlech ausdrécklech.

Aktuell ass et jo esou, wéi gesot, dass de Recrutement sur dossier mat enger Experienz vu fënnf Joer bleift an et beim Examen-concours vun engem op zwee Joer eropgeet, fir dass awer trotzdeem d'Kompetenz garantéiert ass, well, wéi gesot, et ass keen einfache Beruff, et si ganz grouss Responsabilitéiten. An dofir muss d'Kompetenz vun de Riichter op alle Fall gehale ginn. Vu d'Konditioun vum Cours complémentaire en droit luxembourgeois, deen ee muss gepackt hunn, an, wéi gesot, d'Beruffserfahrung, déi muss gi sinn, ass et e Garant, dass eng adaptéiert Kompetenz do ass, fir eebe just de Beruff uerdentlech kënne ze meeschten.

Här President, de Projet ass jo Deel vun engem méi laangen Effort – den Alex Donnersbach huet dat och schonn ënnerstrach –, fir d'ganz Justiz ze stäerken. Mir hu jo scho leschte Summer hei u sech d'Zuel vun de Riichter an den Attaché mat 94 Riichter an 20 Attaché festgeluecht. Et ass jo och geplangt, nach e Pool vun 100 Riichteren an d'Reserv ze kréien, fir eebe just op d'mannst bis 2027 an doriwwer eraus genuch Riichter ze kréien, fir dass déi Justiz extra gutt funktionéiert.

An den Effort, dee wäert konstant virugoen, well och a Saache Formatioun, déi ëmmer méi erausfordernd gëtt, muss d'Formatioun vun de Riichter dem Besoin vun haut onbedéngt ugepasst ginn. Mee dësen Deel vun deem, wat mer elo haut maachen, ass awer ganz wichteg, fir dass déi Mesüeren, déi geholl gi sinn, schonn an der Procedure de Recrutement 2025 kënne applizéiert ginn.

Den zweete Volet vun der Formatioun kënnt da spéider. Och dat geet an déi richteg Richtung.

Här President, Kolleeginnen a Kolleegen, méi Riichter mat enger Experienz a Formatioun, wéi ech ëmmer soen, „à large spectre“ sinn eng signifikativ Plus-value fir eis Justiz, e Garant vum Schutz vun de Residenten, vun de Bierger an ipso facto e Garant vun eise Rechtsstaat.

D'DP deelt dëse Projet mat grousser Iwwerzeegung, an dofir bréngen ech mat Freed den Accord vu menger Fraktioun a soe Merci fir d'Nolauschten.

Plusieurs voix | Très bien!

M. Fernand Etgen, Président de séance | Merci villmools, Madamm Beissel. An dann ass et um honorerabelen Här Dan Biancalana. Här Biancalana, Dir hutt d'Wuert.

M. Dan Biancalana (LSAP) | Merci, Här President. Léif Kolleeginnen a Kolleegen, als LSAP, dat wëll ech virop soen, droe mer dëst Gesetz mat, well et ass jo och den éischten Deel vun enger Reform an d'Konditiounen, fir Attaché de justice ze ginn a finalement Magistrat, gi provisoriéiert. Ech mengen, dat ass eng Erliichterung an dat begreisse mer.

An ech mengen, mir brauchen hei zu Lëtzebuerg eng Justiz, déi gutt opgestallt ass, well d'Justiz e Grondpfeiler vun eise Rechtsstaat ass. An do mengen ech, dass déi Rekrutierungsprozedur, déi mer hei virhuelen, dofir u sech e ganz, ganz wichtegen an decisiven Usaz ass. Mir hunn eng Rekrutierungsweel gehat vu Polizisten. Wat méi Polizisten um Terrain sinn, wat och, mengen ech, méi Affären traitéiert ginn. Mir mierken och, dass d'Affären um Niveau vun der Justiz och deementspreechend zouhuelen.

Mir hunn hei an dësem Haus e Plan de recrutement gestëmmt fir Magistraten, fir och effektiv Posten ze schafen. Also, mengen ech, ass d'Suite logique, dass mer natierlech och hei u de Critères d'accès, de Conditions d'accès schaffen, fir dës Posten och esou gutt wéi méiglech kënne ze besetzen, mee awer och den Zougang effektiv zu dësen Posten ... Och wa mer an eng Richtung ginn, wou mer d'Experienzen oder op Dossieren schaffe méi flexibiliséieren, dann heescht dat awer net – dat ass och virdru scho gesot ginn –, dass dat au détriment ass vun där Rigueur, déi een och als Magistrat, als Attaché soll an de Berufsstand mat erabréngen.

Bon, doriwwer eraus, mengen ech, hate mer jo och an dësem Haus an och an der Justizkommissioun – effektiv, am Joer 2022 war dat – de Rapport nach virleie vum Jean-Claude Wiwinius, deen a senger Qualitéit als President vun der Cour supérieure, mengen ech, och e breede Rapport gemaach huet, deen och ganz interessant war, iwwert d'Attraktivitéit vun der Karriär vum Magistrat. Do ass et natierlech och ëm d'Kommunikatioun selwer vum Riichterberuff gaangen, vum Magistrat, awer och, mengen ech, ëm d'Attraktivitéit vun der Karriär, awer och den Accès an och ëm d'Fonction selwer. Andeems mer d'Gesetz haut hei stëmmen, droe mer deementspreechend och dozou bidden.

Mee ech mengen awer och, dass ee ganz wichtige Punkt och deen Novum ass, dass mer an eiser Verfassung och d'Recht op den Délai raisonnable hunn. A fir dat, mengen ech, och kënne ze maachen, brauche mer, wa mer op där enger Säit Poste schafen, och déi néideg Magistraten, déi och déi néideg Zäit hunn, fir d'Dossieren deementspreechend ze traitéieren. Ech mengen, mat deem heiten Deel si mer averstanen.

An ech mengen, wat een awer och gesäit – an ech hat do och d'Méiglechkeet, eng Question parlementaire ze stellen –, dat ass, wat och den Taux de réussite ass vun deene verschiddene Persounen a Leit, déi de CCDL maachen, notamment och vun deenen, déi

d'Lëtzeburger Nationalitéit hunn, wou et och natierlech schonn d'Méiglechkeet gëtt, an d'Magistratur ze goen: Deen huet sech agependelt tëscht 60 % a 65 % iwwer effektiv déi lescht fënnf Joer. Dat weist also, mengen ech, dass hei och weider muss geschafft ginn an dass och dës Reform néideg ass, fir effektiv och hei weider qualitativ gutt Personal ze hunn, fir dann och weider kënne an der Justiz ze schaffen.

Dëst gesot, ënnerstëtze mer dëse Projet mat. Merci.

M. Fernand Etgen, Président de séance | Merci villmools, Här Biancalana. A prett ass elo den honorerabelen Här Dan Hardy. Här Hardy, Dir hutt d'Wuert.

M. Dan Hardy (ADR) | Merci, Här President. Dir Dammen an Dir Hären, eppes virewech: Och d'ADR begreist de Gesetzesprojet, deen haut hei diskutéiert gëtt. Mir froen eis awer, firwat net schonn éischer esou eng Initiativ geholl ginn ass, wëssend, dass duerch de stramme Wuesstem vun der Populatioun och de Justizapparat fréier oder spéider u seng Grenze stéisst.

Scho méi laang zéien d'Vertrieder vum drëtten Pouvoir d'Alarmglacken, dass se net méi nokommen, zum Beispill d'Verwaltungsgericht, wou d'Zuel vun den Affären déi lescht Joren drastesch an d'Luucht gaangen ass a wou vill Leit ee ganz laangen Otem mussen hunn, fir endlech eng gerichtlech Entscheedung ze kréien.

Zum Gléck huet eist Land am Privatsektor déi néideg Ressourcen, fir op déi sougenannten „Attachés de justice“ zeréckgräifen ze kënne. Juristen, déi aus dem Privatsektor kommen, hunn dacks de Virdeel, dass se net just an engem, mee a verschiddene juristesche Beräicher aktiv waren. Wichteg ass awer, wéi dat de Lëtzeburger Barreau a sengem Avis betount huet, dass de Gesetzesprojet net zum Nodel vum der Qualitéit vun de rekrutierten Magistraten dierf goen. Schliesslech hunn d'Leit dobaussen d'Recht op eng irrefrachabel Justiz.

Dann ass och mat Recht festgehalen ginn, dass d'Kandidaten d'Lëtzeburger Nationalitéit mussen hunn, well dee Beruff en direkte Lien mat der Ausübung vun der Staatsgewalt huet. Wat d'Sproochekenntnisser ugeet, sou gëtt verlaangt, dass déi zukünfteg Attachés de justice am Lëtzeburgereschen an am Franséischen en Niveau C2 mussen hunn an am Däitschen den Niveau C1. Well d'Protokoller vun der Police op Däitsch sinn, ass dat och logesch. Betreffend d'Zougangskonditiounen ass festgehalen ginn, dass zum Beispill beim Examen d'entrée déi professionell Erfahrung vu fënnf op zwee Joer erofgesat gëtt.

Ech kommen zum Schluss. Mir begreissen, wéi gesot, als ADR dëse Gesetzesprojet, deen och der Demande vun der Justiz nokënnt an et erméigleche wäert, dass d'Affäre méi séier kënne traitéiert ginn an d'Bierger manner laang op eng Decisioun vum Gericht waarde mussen, wëssend, dass nach vill ze maache bleift, fir déi sougenannt „Lenteur judiciaire“ besser an de Grëff ze kréien.

Ech soen Iech Merci.

Une voix | Très bien!

M. Fernand Etgen, Président de séance | Merci villmools, Här Hardy. An dann ass et elo un där honorerabler Madamm Sam Tanson. Madamm Tanson, Dir hutt d'Wuert.

Mme Sam Tanson (déi gréng) | Jo, merci, Här President. Och mir begreissen deen heiten Text. Et ass an der Kontinuitéit vun deem, wat iwwert déi lescht Jore gemaach ginn ass. Nodeem ech de Plan pluriannuel deposéiert hat, an eeben nach weider Poste geschafe ginn um Niveau vun der Magistratur, muss

een natierlech och kucken, an dat stoung och schonn deemools an deem legislativen Dossier dran, dass een och misst nach eng Kéier kucken no där viregter Reform – déi jo elo hei e bëssen erëm réckgängig gemaach gëtt, wat ech awer absolutt verstinn –, wou ee konnt no engem Joer schonn nom Barreau an d'Magistratur goen, fir elo weider Schrëtt ze maachen.

Dofir fanne mer dat positiv, dat hei elo ze probéieren. Och déi Adaptatiounen, déi en cours de route nach gemaach gi sinn, fanne mer eng gutt Saach, no den Avisen, déi komm sinn.

Dat Eenzegt, wat ech e bëssen ze bedenke ginn: Et si jo ganz nei Erfarungen, déi een hei sammelt. Et si jo elo wierklech da Leit, déi an d'Magistratur kommen, déi eventuell nach ni e Geriicht vu banne gesinn hunn, déi dann als Riichter schaffe mussen. An ech denken, dass do am Kader vun der Formation eng ganz richteg Roll ze spillen ass. An och denken ech, dass een dat Gantz muss evaluéieren a gegebene-falls kucken, ob muss nogebessert ginn oder net, ob déi Riichter hei och esou séier kënne fonctionnsfäeg sinn, wéi dat bis elo ëmmer de Fall war.

Mee ech fannen awer, dass et wichteg ass, dass ee sech deene Saachen net verschléisst an dat dann och probéiert an dann eebe kuckt, déi néideg Evaluatioun duerno ze maachen, ob et seng Friichte gedroen huet.

Ech ginn den Accord vun deene Gréngen.

Une voix | Très bien!

M. Fernand Etgen, Président de séance | Merci, Madamm Tanson. An de leschten ageschriwwene Riedner ass den honorabelen Här Sven Clement. Här Clement, Dir hutt d'Wuert.

M. Sven Clement (Piraten) | Merci, Här President. Léif Kolleeginnen a Kolleegen, et ass kloer, dass e Mangel u Magistraten dozou féiert, dass d'Delaien op de Geriichter net méi kuerz ginn, an dofir war et nëmme ze begrëssen, wéi als Éischt de Rekrutementsplang erhéicht gouf, fir méi Magistraten ze rekrutéieren. An elo ass eeben déi logesch Konsequenz, dass mer eis dann och d'Moyene musse ginn, fir déi Magistrate kënne ze rekrutéieren, déi mer am Plang virgesinn hunn. Well dee beschte Plang hëlleft eis näischt, wa mer en herno net kënne erfëllen.

An deementspriedend ass dat heiten, mengen ech, e wichtige Schratt, deen och eis Ennerstëtzung fënn, wou ee sech natierlech an den Detailer – an dat ass jo och an der Kommissioun in extenso zum Deel diskutéiert ginn – ka reiwen. Mee ech mengen, um Enn vum Dag ass dat heiten e Gesetz, wat eis erméigleche kann, déi néideg Magistraten ze rekrutéieren. An ech hoffen, dass et dat dann och erfëllt.

Et ass bëssen nach nom Prinzipp Hoffnung, muss ech soe vu menger Säit, fir haut ze soen: Ech hoffen, dass en et erfëllt, mee ech hunn awer ganz grouss Hoffnung doranner.

An dofir kann een deen Text hei matstëmme, fir eeben dat Zil ze errechen, dass d'Delaien op de Geriichter erofginn, dass mer eng méi séier Justiz kréien an dass mer déi néideg Magistraten dann eeben och rekrutéiert kréien. Dat ass d'Zil, an dofir e Jo vun de Piraten.

M. Fernand Etgen, Président de séance | Merci villmools, Här Clement.

D'Regierung huet d'Wuert, d'Madamm Justizministersch Elisabeth Margue. Madamm Margue, Dir hutt d'Wuert.

Prise de position du Gouvernement

Mme Elisabeth Margue, Ministre de la Justice | Merci, Här President. Ech géif ufänken an dem Rapportier e

Merci soe fir säi Rapport. An da géif ech awer och gären all de Membere vun der Justizkommissioun an dem Staatsrot Merci soen, déi et duerch hir séier Aarbecht erlaabt hunn, dass mer dee Projet, dee mer d'lescht Joer vum Summer deposéiert haten, konnte splécken an hei schnell een Deel vum Accès op d'Magistratur scho kënne stëmme, fir notament ze erlaben, dass schonn dës Joer kënne d'Magistrate rekrutéiert ginn. Dee Prozess, dee leeft normalerweis am spéide Fréijoer un, a schonn dës Joer wäerten déi heite Konditiounen sech da kënne applizéieren.

Et ass och déi logesch Suite vun dem Plan pluri-annuel, dee mer d'lescht Joer am Summer hei gestëmmt hunn. Mir erlaben elo, nodeems mer zousätzlech Poste geschaf hunn, och zousätzlech Rekrutierungsméiglechkeeten, andeems d'Juriste souwuel aus dem öffentleche wéi aus dem private Secteur kënne postuléieren fir d'Magistratur, an doduerjer hoffentlech d'Zuel vu Kandidaturen an d'Luucht geet.

Ech wëll awer och ennersträichen, dass dat näischt ännert un der Qualitéit vun de Rekrutementen, well d'Aart a Weis, op déi déi verschidde Kandidaturen evaluéiert ginn, bleift déi selwecht: Et ass entweder no zwee Joer Berufserfahrung dann en Examen, oder no fënnef Joer kann een iwwer Dossier postuléieren. Dat Eenzegt, wat ännert: Et kommen einfach méi Leit a Fro, fir eng Kandidatur ze stellen.

Zousätzlech mussen natierlech Efforte gemaach gi fir d'Ausbildung vun de Justiz-Attachéen. Dat ass och zum Deel den Objet vun dem zweeten Deel vum Projet, dee mer, wéi gesot, ofgespléckt hunn an dee mer natierlech weider wäerten an der Prozedur féieren, mee wou mer dann och mussen op den Avis vum Staatsrot waarden an dann deementspriedend Adaptatiounen maachen, wann néideg.

Zousätzlech schaffe mer och un engem Projet – dat steet och am Accord de coalition – fir eng Filière parallèle, fir nach méi Magistraten och ze rekrutéieren, déi eng gréisser Erfahrung hunn an eng besonnesch Spezialisatioun. An d'Hoffnung ass, dass mer kënne och déi Kandidaten unzéien, andeems mer et eeben attraktiv maachen, an d'Magistratur ze kommen, och nodeems een eebe schonn eng ganz Rei Erfarungen an engem anerene Domän gesammelt huet.

An enger éischer Phas wäert deen dote Projet op d'Verwaltungsgerichter applizéiert ginn an dann deementspriedend, wann et Succès huet, och kënnen ausgeweit ginn. Dat heiten ass op alle Fall eng wichteg Etapp, fir kënne zousätzlech Magistraten ze rekrutéieren an deem Manktum, dee mer wierklech scho méi wéi eng Kéier hei diskutéiert hunn, och entgéintzewierken.

Ech soen Iech e grouse Merci fir déi breet Ennerstëtzung.

M. Fernand Etgen, Président de séance | Merci der Madamm Justizministersch Elisabeth Margue.

D'Diskussioun ass elo ofgeschloss. Mir kommen elo zur Ofstëmmung iwwert de Projet de loi 8433A. Den Text steet am Document parlementaire 8433A⁵.

Vote sur l'ensemble du projet de loi 8433A et dispense du second vote constitutionnel

D'Ofstëmme fänkt un. Da komme mer elo zum Vote par procuration. De Vott ass ofgeschloss.

De Projet de loi ass mat 60 Jo-Stëmme eestëmmegeg ugeholl.

Ont voté oui : Mmes Diane Adehm (par M. Laurent Mosar), Nancy Arendt épouse Kemp, MM. Maurice Bauer, Jeff Boonen, Alex Donnersbach, Emile Eicher, Félix Eischen, Paul Galles, Mme Françoise Kemp, MM. Marc Lies (par Mme Stéphanie Weydert), Ricardo Marques, Mmes Octavie

Modert, Nathalie Morgenthaler, MM. Laurent Mosar, Jean-Paul Schaaf, Marc Spautz, Charles Weiler, Mme Stéphanie Weydert, MM. Claude Wiseler, Michel Wolter et Laurent Zeimet ;

Mme Barbara Agostino, MM. Guy Arendt, André Bauler, Gilles Baum, Mmes Simone Beissel, Corinne Cahen, MM. Luc Emering, Fernand Etgen, Patrick Goldschmidt (par M. Gusti Graas), Gusti Graas, Mmes Carole Hartmann, Mandy Minella, Lydie Polfer (par M. Gérard Schockmel) et M. Gérard Schockmel ;

M. Dan Biancalana, Mmes Taina Bofferding, Liz Braz (par M. Georges Engel), Francine Closener, M. Yves Cruchten, Mme Claire Delcourt, MM. Mars Di Bartolomeo, Georges Engel, Franz Fayot, Claude Haagen, Mme Paulette Lenert (par M. Yves Cruchten) et M. Ben Polidori ;

MM. Jeff Engelen, Dan Hardy, Fred Keup, Mme Alexandra Schoos et M. Tom Weidig ;

Mme Djuna Bernard, M. Meris Sehic, Mmes Sam Tanson et Joëlle Welfring ;

MM. Sven Clement et Marc Goergen ;

MM. Marc Baum et David Wagner.

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

14. 8488 – Projet de loi portant modification de la loi du 20 juillet 2018 portant réforme de l'administration pénitentiaire

Mir komme elo zum leschte Punkt vun haut de Mëtt, zum Projet de loi 8488 iwwert de Rekrutement vum Direkter a vum Soudirekter vum zukünftege Centre pénitentiaire fir Mannerjäreger. D'Riedezäit ass nom Basismodell festgeluecht. An d'Wuert kritt elo d'Madamm Rapporteuse vun dësem Projet de loi, déi honorabel Madamm Stéphanie Weydert. Madamm Weydert, Dir hutt d'Wuert.

Rapport de la Commission de la Justice

Mme Stéphanie Weydert (CSV), rapportrice | Villmools merci, Här President. Léif Kolleeginnen a Kolleegen, d'Gestioun vum Prisongswiesen ass eng vun de wichtige Missiounen vum eiser Justiz.

(M. Claude Wiseler reprend la présidence.)

Eng gutt organiséiert an effizient funktionéierend Prisongsverwaltung ass essentiel, fir d'Grondrechter vun all deenen, déi am Prisong eng Strof mussen ofsetzen, ze garantéieren, sou och vu mannerjäregen Delinquanten.

An deem Kader sinn d'Schafung vun engem Strofrecht fir Mineuren esouwéi och vun engem Prisong fir Mannerjäreger wichteg Schrëtt. Dës Projet vu grousser Envergue verlaangt net nëmme eng Adaptatioun vun eise Gesetzskader, mee och eng strateegesch Planung vun der Infrastruktur souwéi vun der Personalbesetzung.

Dofir ass et néideg, de künftege Jugendprisong am Gesetz iwwert d'Prisongsverwaltung vun 2018 ze verankeren an de Rekrutement vum Direkter a vum Directeur adjoint vun neie Centre pénitentiaire virzeéien. Nëmme esou kënne déi verantwortlech Persounen sech aktiv an d'Planung vum neie Bau mat abringen a sech mam Bau familiariséieren, eier dësen a Betrib geet – eng Approche, déi scho beim Prisong Uerschterhaff mat Succès applizéiert gouf.

Une voix | Très bien!

Mme Stéphanie Weydert (CSV), rapportrice | Beim Uerschterhaff huet dës der Direktioun erméiglecht,